

Landesbibliothek Oldenburg

Digitalisierung von Drucken

Phaedri Avgusti Liberti Fabvlarvm Aesopiarvm Libri V.

Phaedrus

Rintelii, MDCCXXXVIII

VD18 13044567

Fab. II. Ranae Regem petentes.

urn:nbn:de:gbv:45:1-17134

FAB. II.

Ranae Regem petentes.

Athenae cum florerent aequis legibus,

Procax libertas ciuitatem miscuit,

Frenumque soluit pristinum licentia.

Hinc conspiratis factionum partibus,

Arcem tyrannus occupat Pisistratus.

Cum tristem seruitutem flerent Attici,

Non quia crudelis ille, sed quoniam graue

Omne insuetis onus; et coepissent queri:

Aesopus talem tum fabellam rettulit.

Ranae, vagantes liberis paludibus,

10

Clamore magno regem petiere a Ioue,

Qui dissolutos mores vi compesceret.

Pater Deorum risit, atque illis dedit

Paruum tigillum, missum quod subito vadi

Motu sonoque terruit pauidum genus.

15

Hoc mersum limo cum iaceret diutius:

Forte vna tacite profert e stagno caput,

Et, explorato rege, cunctas euocat.

Illae, timore posito, certatim adnatant,

Tignumque supra turba petulans insilit.

20

Quod cum inquinassent omni contumelia:

Alium rogantes regem misere ad Iouem:

Inutilis quoniam esset, qui fuerat datus.

Tum misit illis hydram, qui dente aspero

Corripere coepit singulas: frustra necem

25

Fugitant inertes: vocem praeccludit metus.

Furtim igitur dant Mercurio mandata ad Iouem,

Afflictis ut succurrat. Tunc contra Deus,

Quia noluistis vesirum ferre, inquit, bonum;

A 2

Ma.

Malum perferte. Vos quoque, o ciues, ait, 30
Hoc sustinete: maius ne veniat malum.

Omnis mutatio periculosa.

Cum Athenae iustis florerent legibus: immoderata passim visa est ciuitatem vexare libido, et imperii impatiens quisque libertatem anhelauit. Variis ergo obortis factionibus, Pisistratus tyrannus occupat arcem. Hanc adeo tristem cum Athenienses deplorarent servitutem, suaque accusarent fata, non quod regis premerentur crudelitate, sed quod iugo non didicerint subdere collum: sequentem Aesopus narrauit fabulam. Ranae, paludibus ac stagnis libere vagantes, clamoribus magnis a Ioue regem petierunt: ut poenis ciuium compesceret insolentiam. Subridens Jupiter parvum illis dedit tigillum: quod subito demissum maiori strepitu ranis trementibus terrorem incussit. Cum vero diutius immotum haeret limo: vna forte prospicit rana, et, regis viribus exploratis, euocat omnes. Illae certatim sine timore adnatant, et in lignum petulantis insiliunt. Quod cum satis contumeliose tractassent: mittunt ad Iouem, qui alium sibi regem expeterent; quoniam, qui datus fuerit, inutilis esset. Illis ergo hydram mittit, qui obuias sibi, quotquot corripere potest, dilaniat erudeliter. Ranae imbelles ac miserae obmutuerunt præ metu, et regis sui tyrannidem frustra vitare, et saluti consulere studuerunt. Rebus desperatis, clanculum ad Iouem suppli-
catum



eatum mittunt oratorem Mercurium, vt sibi
misere afflictis et oppressis subueniret. Deus
vero, nihil vobis, respondet, supereft solatii,
vel auxilii: et iugum regis mali iam subeun-
dum est merito: quoniam, qui vobis praeefset,
bonum ferre noluistis. Et vos, o ciues, Aeso-
pus tum Atheniensibus dixit, quod euenit, ae-
quo sustinete animo: ne maius inde vobis ma-
lum oboriatur.

FAB. III.

Graculus superbus et Pavo.

Ne gloriari libeat alienis bonis,
Suoque potius habitu vitam degere:
Aesopus nobis hoc exemplum prodidit.

Tumens inani Graculus superbia,
Pennas, Pauoni quae deciderant, sustulit, 5
Seque exornauit: dein contemnens suos,
Formoso se pauonum immiscuit gregi.
Illi impudenti pennas eripiunt aui,
Fugantque rostris. Male multatus graculus
Redire moerens coepit ad proprium genus: 10
A quo repulsus tristem sustinuit notam.
Tum quidam ex illis, quos prius despexerat:
Contentus nostris si fuisses sedibus,
Et quod natura dederat voluisses pati:
Nec illam expertus essem contumeliam, 15
Nec hanc repulsam tua sentiret calamitas.

Candide et constanter.

Ne quis conetur alienis gloriari bonis: vi-
vere contra studeant omnes rationibus suis
conuenienter: hanc nobis fabulam Aesopus